

Awe tin apertura oficial di Casita Historico na Weststraat y exposicion di Parke Arikok

ORANJESTAD (AAN)-- En conexion cu un exposicion di Parke Arikok y presentacion di pintura, cu lo worde inaugura awetardi oficialmente, medionan di comunicacion social a haya oportunidad ayera atardi di cera conoci cu e Casita Historico, di Weststraat, cu a habri su portanan pa un conferencia di prensa tuma lugar.

A hiba palabra señora Dilma Arends, Relacionista Publico di Parke Arikok, Arquitecto Yvonne Webb, director di Oficina di Monumento, señor Edmond Tujeehut y señor Eddie Croes, funcionarionan di Parke Arikok.

Señora Dilma Arends a duna un splicacion tocante e exposicion organiza pa Parke Arikok y e acto di apertura oficial di e Casita Historico awetardi, unda cu lo otorga premio na e ganadornan di e concurso di pintura escolar, unda alumnonan di tur nivel di school na Aruba a participa, esta schoolnan regular, schoolnan special y Interna-

tional School of Aruba.

Señora Arq. Yvonne Webb a elabora riba e historia di e cas historico cu originalmente tabata situa banda di Aruba Bank na Caya Betico Croes, y e motibo di su mudamento pa Weststraat, mientras cu señores Tujeehut y Eddie Croes a enfoca riba Parke Arikok, su importancia, y e importancia pa nos comunidad en general cera conoci cune.

E exposicion cu prensa por a admira den un recorrido guia pa sra. Arends, ta hopi interesante, ya cu den espacion chiquito Parke Arikok ta worde representa den su esencia, esta su flora y su fauna, como tambe pega furando e murayanan di e sala principal, un cantidad enorme di pinturanan masha colorido, y creativo, unda cada un talento hoben ta reflesha Parke Arikok y naturaleza di Aruba, segun nan vision.

Den otro articulo DIARIO lo amplia e informacion riba e topiconan aki.

